

SAVEZ KLIZAČKIH SPORTOVA BOSNE I HERCEGOVINE

## **POSLOVNIK O RADU SKUPŠTINE**

Sarajevo, 04.11 2010.

## *OPŠTE ODREDBE*

### Član 1.

Ovim poslovníkom uređuje se način sazivanja i odlučivanja Skupštine Saveza klizačkih sportova Bosne i Hercegovine (u daljem tekstu Skupština), prava i obaveze, te uslovi rada predstavnika u Skupštini, kao i druga pitanja značajna za uspješan rad Skupštine.

### Član 2.

Skupštinu čine članovi-delegirani predstavnici klubova koji su registrovani u skladu sa zakonom.

Skupština ima najmanje 10 članova.

Predstavnike klubova za Skupštinu Saveza na prijedlog klubova predlažu njihovi matični entitetski savezi vodeći računa o njihovoj ravnopravnoj zastupljenosti.

Svaki entitetski savez predlaže po 5 predstavnika u Skupštinu Saveza.

Članovi Skupštine se na prijedlog UO mogu birati i iz reda predstavnika sponzora, afirmiranih sportskih radnika, sportista i predstavnika drugih organizacija vodeći računa o regionalnoj, entitetskoj i nacionalnoj zastupljenosti u skladu sa Članom 2. stav 1, Članom 18. i Članom 23. Statuta Saveza.

Članovi Skupštine ne mogu biti osobe koje su svojim radom i ponašanjem u prethodnom periodu narušavali ugled Saveza ili djelovali protiv interesa klizačkog sporta u Bosni i Hercegovini.

Mandat predstavnika u Skupštini traje 4 godine.

### Član 3.

Odredbe Poslovnika obavezne su za sve predstavnike u Skupštini, kao i za druge osobe koje učestvuju u radu Skupštine.

## *PRAVA I OBAVEZE PREDSTAVNIKA U SKUPŠTINI SAVEZA*

### Član 4.

Delegirani predstavnik (u daljem tekstu: predstavnik) može obavljati svoju dužnost, te imati prava i obaveze nakon verifikacije mandata u Skupštini.

Verifikacija mandata svakog predstavnika obavlja se na prvoj sjednici Skupštine.

Na izbornoj ili konstituirajućoj sjednici Skupštine obavlja se verifikacija mandata svih izabranih predstavnika.

### Član 5.

O punovažnosti mandata odlučuje Skupština na prijedlog verifikacione komisije.

### Član 6.

Verifikaciona komisija ispituje punovažnost izbora predstavnika na osnovu odluke o izboru predstavnika u Skupštini i dokaza o punomoći kluba i saglasnosti nadležnog entitetskog saveza te podnosi izvještaj Skupštini.

O izvještaju Verifikacione komisije otvara se rasprava. Nakon rasprave, Skupština javnim glasanjem donosi odluku o verifikaciji mandata predstavnika.

#### Član 7.

U obavljanju svoje funkcije predstavnik u Skupštini ima pravo pokrenuti raspravu o pitanjima iz nadležnosti rada Skupštine, podnositi prijedloge odluka i drugih akata, izvršavati zadatke koje mu povjeri Skupština, te učestvuje u drugim aktivnostima Skupštine.

#### Član 8.

Predstavnik ima pravo zahtijevati od generalnog sekretara stručnu pomoć i obavještenja.

#### Član 9.

Predstavnik ima pravo tražiti obavještenja i objašnjenja od predsjednika Saveza, a o pitanjima koja se odnose na rad Skupštine. Predsjednik ima pravo tražiti obavještenja i objašnjenja od generalnog sekretara o pitanjima koja se odnose na njegov rad.

#### Član 10.

Predstavnik pitanje može postaviti usmeno ili pismeno. Na postavljeno pitanje odgovor se, po pravilu, daje usmeno. Odgovor daje predsjednik ili generalni sekretar.

#### Član 11.

Svi materijali u vezi s dnevnim redom sjednice Skupštine dostavljaju se predstavniku lično.

#### Član 12.

Predstavnik ima pravo i obavezu prisustvovati i učestvovati u radu Skupštine. U slučaju spriječenosti, predstavnik je dužan o tome obavijestiti generalnog sekretara.

O prisustvovanju predstavnika sjednicama vodi se evidencija.

Predsjednik može zatražiti od predstavnika koji je više puta izostao sa sjednica, a izostanke nije opravdao, da iznese razloge zbog kojih je izostao. Skupština će o iznesenim razlozima obavijestiti klub-član čiji je predstavnik.

### *SJEDNICE SKUPŠTINE*

#### Član 13.

Sjednice Skupštine saziva i predsjedava im predsjednik Saveza.

U slučaju odsutnosti ili spriječenosti predsjednika, sjednice saziva i predsjedava im potpredsjednik.

#### Član 14.

Predsjednik saziva Skupštinu kad prosudi da je to potrebno, a najmanje jednom godišnje. Saziva je i ako to zatraži Upravni odbor ili 1/3 članova Skupštine.

Svake četvrte godine saziva se izborna sjednica Skupštine.

Izbornu Skupštinu otvara predsjednik Saveza i njom rukovodi do izbora novog predsjednika.

#### Član 15.

Poziv za sjednicu s prijedlogom dnevnog reda i eventualno materijalima, dostavlja se predstavniku najmanje 15 dana prije sjednice.

U posebnim slučajevima predsjednik može sazvati sjednicu i u kraćim rokovima, pa i odmah.

#### Član 16.

Prijedlog dnevnog reda predlaže predsjednik, a usvaja se na početku sjednice.

Prijedlog dnevnog reda se može izmijeniti ili dopuniti, a prijedlozi izmjena i dopuna moraju biti obrazloženi i prihvaćeni.

#### Član 17.

U radu Skupštine pored predstavnika sa pravom odlučivanja definisanih Članom 2 Poslovnika, mogu učestvovati kao gosti, predstavnici drugih sportskih i državnih tijela, preduzeća i ustanova bez prava odlučivanja.

Predstavnike navedenih tijela na sjednicu poziva predsjednik.

U radu Skupštine mogu učestvovati i počasnici članovi Saveza, bez prava odlučivanja.

#### Član 18.

O održavanju reda na sjednici brine se predsjednik, odnosno osoba koja ga zamjenjuje.

Za povredu reda na sjednici predsjednik može opomenuti predstavnika, a može mu i oduzeti riječ.

Opomena će se izreći predstavniku koji svojim ponašanjem ili govorom narušava red i odredbe Poslovnika.

Predstavniku će se oduzeti riječ kad i dalje, nakon opomene, narušava red i odredbe Poslovnika.

#### Član 19.

Nakon otvaranja Skupštine, a prije prihvatanja dnevnog reda, predsjednik utvrđuje da li je prisutan dovoljan broj predstavnika.

Skupština ima kvorum za rad ako joj prisustvuje više od polovine ukupnog broja članova.

Skupština odlučuje napolovičnom većinom glasova prisutnih predstavnika osim u slučaju predviđenim Članom 45. Statuta Saveza gdje je potrebna dvotrećinska većina svih članova Skupštine.

#### Član 20.

Poslije usvajanja dnevnog reda prelazi se na raspravu o pojedinim tačkama onim redoslijedom koji je utvrđen u prihvaćenom dnevnom redu.

Na sjednici se o svakoj tački dnevnog reda otvara rasprava prije nego što se o njoj odlučuje.

O pojedinim pitanjima raspravlja se dok ima prijavljenih govornika, a potom predsjednik formulira zaključak i završava raspravu.

#### Član 21.

Prijave za riječ podnose se dizanjem ruke do zaključenja rasprave. Predsjednik daje predstavnicima riječ po redu prijave. Predstavnik treba govoriti kratko i jezgrovito, bez ponavljanja izlaganja koja su već iznijeta na sjednici, te se držati predmeta rasprave. Kad rasprava o nekom pitanju traje duže, predsjednik može predložiti da se ograniči trajanje govora predstavnika. O ograničavanju govora odlučuje Skupština.

#### Član 22.

Predsjednik može dati riječ pojedinom predstavniku ili drugoj osobi, koja želi dati potrebno stručno ili drugo obrazloženje u vezi s pitanjem o kojem se raspravlja, odgovoriti na neposredno postavljeno pitanje u raspravi, ili protumačiti stav prethodnog izlaganja. Niko ne može govoriti dok mu predsjednik ne da riječ.

#### Član 23.

Nakon zaključenja rasprave, predsjednik poziva predstavnike da glasaju o prijedlogu. Po pravilu se glasa o cjelini prijedloga. Ako su na prijedlog stavljeni amandmani, prvo se glasa o njima, a zatim se glasa o prijedlogu u cjelini. O amandmanima se glasa redom kojim su podneseni. Usvojeni amandmani postaju sastavni dio prijedloga.

#### Član 24.

Glasanje na sjednici je javno - dizanjem ruku.

#### Član 25.

Predsjednik po završenom glasanju utvrđuje tekst odluke, zaključka ili drugog akta koji je izglasan ukoliko glasanje nije provedeno o prethodno pismeno utvrđenom prijedlogu.

### *IZBORI TIJELA SKSBIH*

#### Član 26.

Skupština bira i razrješava:

- Predsjednika i potpredsjednike
- članove Upravnog odbora

#### Član 27.

Predsjednik i potpredsjednici Skupštine su istovremeno predsjednik i potpredsjednici Upravnog odbora Saveza.

#### Član 28.

Postupak izbora tijela SKSBIH provodi se na način da se prvo bira predsjednik.

Ako za dužnost predsjednika ima dva ili više kandidata, izabran je kandidat koji dobije većinu glasova prisutnih predstavnika. Ako u prvom krugu niti jedan kandidat ne dobije potrebnu većinu, glasanje se ponavlja za dva kandidata koji su dobili najviše glasova.

U drugom krugu smatra se izabranim kandidat koji dobije veći broj glasova. Ako za dužnost predsjednika ima samo jedan kandidat, smatra se izabranim ako dobije većinu glasova prisutnih predstavnika.

#### Član 29.

Izbor predstavnika SKSBIH u Olimpijski komitet Bosne i Hercegovine provodi Upravni odbor SKSBIH.

#### Član 30.

Kandidati za predsjednike pojedinih tijela SKSBIH mogu biti osobe izvan kruga predstavnika na Skupštini, pod uslovom da daju izjavu kojom prihvataju kandidaturu.

#### Član 31.

Mandati izabranog predsjednika, potpredsjednika i članova Upravnog odbora traju četiri godine, odnosno svima do isteka mandata tijela u koja su birani do Izborne skupštine, sa mogućnošću ponovnog izbora.

Pojedinoj osobi mandat može prestati i prije isteka roka na koji je izabran u skladu sa članom 21. Statuta SKSBIH.

Ukoliko pojedinoj osobi mandat prestane prije roka na koji je izabrana, bira se nova osoba.

U slučaju prestanka mandata predsjednika SKSBIH iz bilo kojeg razloga, mandat prestaje svim članovima Upravnog odbora s danom održavanja sjednice Skupštine na kojoj se bira novi predsjednik.

### *JAVNOST RADA*

#### Član 32.

Rad Skupštine je javan.

### *ZAPISNICI SJEDNICA*

#### Član 33.

O radu sjednice Skupštine vodi se zapisnik koji sadržava sljedeće podatke:

- mjesto i vrijeme održavanja sjednice
- ime osobe koja predsjedava sjednici
- ime zapisničara i ovjerivača zapisnika
- imena prisutnih predstavnika
- imena drugih osoba prisutnih na sjednici
- utvrđeni dnevni red
- kratki opis toka sjednice, usvojene odluke, zaključci i drugi akti u skraćenom obliku

Zapisnik potpisuje predsjednik, zapisničar i ovjerivač zapisnika.

#### Član 34.

Zapisnik potvrđuje Upravni odbor na prvoj sljedećoj sjednici.

## ZAVRŠNE ODREDBE

### Član 35.

Ovaj Poslovnik sastavni je dio Statuta SKSBIH.  
Odredbe ovog Poslovnika primjenjuju se na odgovarajući način i na rad  
Upravnog odbora.  
Odredbe ovog Poslovnika tumači Skupština.

### Član 36.

Poslovnik stupa na snagu danom donošenja.

Predsjednik  
Zikrija Đonko

Izmjene Poslovnika o radu Skupštine usvojene je na Skupštini Saveza, održanoj  
20.06.2013. godine.